

**Vorarlberger Landesarchiv, Urkunde Nr. 8497**

11. November 1544

Ich Jerg Franz Im oberdorff zu Thorenbüren gesessen Bekhenn offentlich für mich all mein erben unnd nachkomer unnd thun khundt allermeniglich mit dem Brieff das ich mit wolbedachtem Sin unnd mut Cittiger vorbrachtung unnd guten vorwissen auch von meins bessren nutz wegen dem Edlen unnd vesten Junkher Hanßen von Emps zu der Hohen Emps Innamen und von wegen zu Handen als stifter unnd verwalter der Zeitt der Pfrundt des würdigen gotzhus der Cappel Im oberdorff zu Thorenbüren Allen sinen pfrund pfleger Inbeber unnd Verwalter wer dis ye sind unnd allen Iren nachkhomen Umb zway unnd zwainzig pfund pfennig guter unnd generer diz Lands werinng Dero ich von Ime gentzlich gewertt ansprecht unnd bezalt bin unnd die mir auch an meinen schinbarn nutz komen unnd bewendt sind Ains stätlichen Vesten unnd Ewigen khouffs Recht unnd Redlich zu kouffen gegeben hab ain Pfund zwen schiling pfenning an gedachter Munz unnd wering Rechtz stats Jarlichs unnd Ewigs Zins unnd gelts Von auß unnd ab meinem aigen Häuß Hofstatt stadel mit samp allem gezimer Im oberdorff Darinn ich sesshafft bin unnd driy Kamra Rebwachs hinda daran gelegen ann ain ander stossett obna an aman stöffis soligen Hostatt unnd vorna an die gassen unnda und hinda ann Bartlome Raübergs erben Sollich gemelt undrpfandnt sol mitt aller seiner Recht unnd gerechtikaitt steg Weg ob unnd underes davon ganz nichts ausgenommen Umb bemelt Houptgutt Zins unnd was disser Brieff weyset dem vogenanten Jüncker Hanßen von Emps allen seinem Pfrund Pflegern Wer die ye sind unnd allen khünfftig Inhaber unnd nachkomen recht behafft underpfandnt Haissen unnd sein für frey ledig Dan hindan gesetzt Sex halben Pfennig an sant othmars Zins sunst ganz unbekümertt Dennoch sollen ich mein erben unnd nachkomen So gemelt underpfandnt yemer Inhaben Der gedachten Pfrund stifter Pfleger verwalter unnd allen khünfftig Inhaber und allen ieren nachkomen das gedacht ain Pfünd zwen schiling Jarlichs Zins Nuhinfüro Jarlich auch yedes Jars allein unnd Besonder allweg auff sant martis tag des Hailigen Bischoffs gutlich Richten geben unnd die zu Im sichern Handen unnd gewalt antwurten yedes Jars onne Verzüg unnd onne allen Im Costen unnd schaden Dan welches Jars das nit beschehe magen der gedachten Pfrund stifter Pfleger allen khünfftig Inhaber ald wem Sy es bevelhen unnd allen ieren nachkomen yer unnderpfandnt angriffen Darzu mich ald meiner erbenn Ann andren unsren ligenden unnd waxenden güter anlangen mit allen gerichtten gaistlichen unnd weltlichen Lüten unnd gerichtten So lang will und gnug Unndz Inn umb ainen yeden Im gefalnen ausstendigen Zins samp Costen unnd schaden Inen nach dem Rechten darüber gangen voligclich Ausrichtung und bezalung besthen ist onne allen Im schaden Unnd auff solich underpfand umb Houptgutt Zins unnd was dißer Brieff weysett Sollen ich all mein erben unnd nachkomen der obgedachten Pfrund Pfleger unnd allen khunnfftig Inhaber bemelter Pfrund unnd allen ieren nachkomen doch gut getreuw Weren unnd vertiger sein für all Intrag abgang unnd ansprach Inen die nach dem vechten zuvertreten unnd zuversprechenn gegenn meniglichem wo sy das Bedurffen ald nötturfftig werden gentzlich one Im abgang unnd schaden Doch mogen ich mein Erben unnd nachkomen Auhinfüro welches Jars Wir wollen Allwegen auff bestimpten sannt martinstag des Hailigen bischofs den gemelten Zins mit sonnernhafften Houptgutt darumb er erkaufft ist unnd allen vor verfallen Zinßen ab dato ainer oder mer unbezalt ausstunde woll Widerumb abkouffen unnd lösßen Alles onne gefarlich Unnd des alles zu warem Urkhundt unnd vester sicherhaitt So hab ich Obgenanter Jerg Franz mitt Vleis unnd Ernst gebetten unnd Erbetten den Ersamen unnd weyßen Joßen Albrich an der Zeitt Amman zu Thorenbüren das Er seinen Aigen Insigel für mich unnd all mein erben Doch Imen Unnd seinen Erben onne schaden offentlich an dißnen Brieff gehenckt hatt Der geben ist auff santt Martins tag Des Hailigen Bischufs Nach Cristus Unßers Erlößers gepurtt gezelt thußend fünff Hundert unnd darnach Im vier unnd vierzigsten Jars.

**Rückseite:**

Dieser Brief ist für Inß...richendt  
Zinst Hanß Liebherr

Geörg Franz Im Oberdorff zinst 1lb 2ßd  
1544

Der Brief gehört der Cappel